

BOSNA I HERCEGOVINA
Konkurencijsko vijeće



BOSNA I HERCEGOVINA
Konkurencijski savjet

RJEŠENJE

**Po Zahtjevu za pojedinačno izuzeće od zabrane sporazuma privrednog subjekta Molson Coors
d.o.o. Banja Luka**

Sarajevo
februar, 2019. godine



Broj: UP-06-26-4-035-21/17
Sarajevo, 25.02.2019. godine

Na osnovu člana 25., člana 42., a u vezi sa članom 4. st. (1) i (3), i članom 5. Zakona o konkurenciji ("Službeni glasnik BiH", br. 48/05, 76/07 i 80/09) u postupku pokrenutom po Zahtjevu za pojedinačno izuzeće sporazuma od zabrane od strane privrednog subjekta Molson Coors d.o.o. Banja Luka, Mladena Stojanovića 43, 78 000 Banja Luka u smislu člana 5. stav (1) Zakona o konkurenciji, zaprimljenog dana 13.11.2017. godine pod brojem: UP-04-26-4-035-1/17, Konkurencijsko vijeće, na 47. (četrdesetsedmoj) sjednici održanoj dana 25.02.2019. godine, donijelo je

R J E Š E N J E

1. Utvrđuje se pojedinačno izuzeće sporazuma koji se odnosi na Listu uslova koja predstavlja osnov za zaključivanje Ugovora o ekskluzivnoj distribuciji i Ugovora o licenci, zaključenu između privrednih subjekata „Bavaria” N.V. Netherlands, s jedne strane i privrednih subjekata Molson Coors d.o.o. Banja Luka, „Zagrebačka pivovara” d.o.o. Zagreb, „Apatinska pivara Apatin” d.o.o. Apatin i „Trebjesa” d.o.o. Nikšić, s druge strane, u smislu člana 4. st. (1) i (3) i člana 5. Zakona o konkurenciji.
2. Pojedinačno izuzeće iz tačke (1) dispozitiva ovog Rješenja, utvrđuje se na vremenski period od 5 (pet) godina i počinje teći od dana zaključenja Liste uslova između privrednih subjekata „Bavaria” N.V. Netherlands, s jedne strane i privrednih subjekata Molson Coors d.o.o. Banja Luka, „Zagrebačka pivovara” d.o.o. Zagreb, „Apatinska pivara Apatin” d.o.o. Apatin i „Trebjesa” d.o.o. Nikšić, s druge strane.
3. Ovo Rješenje je konačno i bit će objavljeno u Službenom glasniku Bosne i Hercegovine, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće je dana 13.11.2017. godine, pod brojem UP-06-26-4-035-1/17 zaprimilo Zahtjev za pojedinačno izuzeće od zabrane sporazuma, podnesen od strane privrednog subjekta Molson Coors d.o.o. Banja Luka, Mladena Stojanovića 43, 78 000 Banja Luka, (dalje u tekstu: Podnosilac zahtjeva ili Molson Coors) koji se odnosi na Listu uslova zaključenu između privrednih subjekata „Bavaria” N.V. Netherlands (u daljem tekstu: Bavaria) kao prodavca, s jedne strane i privrednih subjekata Molson Coors d.o.o. Banja Luka, „Zagrebačka pivovara” d.o.o. Zagreb, (u daljem tekstu: Zagrebačka pivovara) „Apatinska pivara Apatin” d.o.o. Apatin (u daljem tekstu: Apatinska pivara) i „Trebjesa” d.o.o. Nikšić, (u daljem tekstu: Trebjesa) kao kupaca, s druge strane, u smislu člana 5. stav (1) Zakona o konkurenciji («Službeni glasnik BiH», br. 48/05, 76/07 i 80/09), (u daljem tekstu: Zakon).

Zaprimljeni Zahtjev nije bio kompletan, te je Podnosiocu zahtjeva dana 15.05.2018. upućen zahtjev br: UP-06-26-4-035-2/17 za dopunu istog i uplatu administrativne takse, kao i dana 01.10.2018. godine dopis broj UP-06-26-4-035-11/17 i dana 10.12.2018. godine dopis broj UP-06-26-4-035-18/17.

Podnosilac zahtjeva je dopunio Zahtjev dana 25.05.2018. godine dopisom broj: UP-06-26-4-035-3/17 i dokazom o uplati administrativne takse, nakon čega je Konkurencijsko vijeće utvrdilo da je isti kompletan i uredan, te dana 13.08.2018. godine izdalo Potvrdu o prijemu kompletnog i urednog Zahtjeva za pojedinačno izuzeće od sporazuma, u smislu člana 28. stav (1) Zakona.

1. Stranke u postupku

Stranke predmetnog postupka su privredni subjekti Molson Coors d.o.o. Banja Luka, Mladena Stojanovića 43, 78000 Banja Luka, „Zagrebačka pivovara” d.o.o. Zagreb, Ilića 224, 10000 Zagreb, „Apatinska pivara Apatin” d.o.o. Apatin, Trg Oslobođenja 5, 25260 Apatin i „Trebjesa” d.o.o. Nikšić, Njegoševa br.18, 81400 Nikšić i privredni subjekt „Bavaria” N.V. Netherlands, de Stater 1, 5737 Lieshout, Holandija.

1.1. Privredni subjekt Molson Coors

Privredni subjekt Molson Coors d.o.o. Banja Luka, Mladena Stojanovića 43, 78 000 Banja Luka registrovan je u Okružnom privrednom sudu u Banjoj Luci pod brojem: 1-17313-00 sa ugovorenim i uplaćenim kapitalom u iznosu od (..)***¹ KM i u (..)***% vlasništvu privrednog subjekta Zagrebačka pivovara, društvo sa ograničenom odgovornošću za proizvodnju piva, alkohola i bezalkoholnih pića, Zagreb, Ilica 224, 10000 Zagreb, Republika Hrvatska.

Osnovna djelatnost privrednog subjekta Molson Coors je trgovina na veliko pićima. Privredni subjekt Molson Coors nema povezanih lica u Bosni i Hercegovini.

1.1.1. Privredni subjekt Zagrebačka pivovara

Privredni subjekt Zagrebačka pivovara d.o.o. Zagreb, Ilica 224, 10000 Zagreb, Republika Hrvatska registrovan je u Trgovačkom sudu u Zagrebu pod brojem: MBS 080027017 i OIB 83771985821 kao društvo sa ograničenom odgovornošću za proizvodnju piva, alkoholnih i bezalkoholnih pića. Jedini član i osnivač društva jeste privredni subjekt Cervesia Zagreb d.o.o. za upravljanje Zagreb, Radnička cesta 80 10000 Zagreb, Republika Hrvatska.

Osnovna djelatnost privrednog subjekta Zagrebačka pivovara je proizvodnja piva, alkoholnih i bezalkoholnih pića.

1.1.2. Privredni subjekt Apatinska pivara

Privredni subjekt Apatinska pivara je društvo ograničene odgovornosti registrovano u Registru privrednih subjekata Republike Srbije pod brojem 08045577, na adresi Trg Oslobođenja 5, 25260 Apatin. Jedini član i osnivač društva jeste privredni subjekt Molson Coors SER d.o.o. Apatin.

Osnovna djelatnost privrednog subjekta Apatinska pivara je proizvodnja piva.

1.1.3. Privredni subjekt Trebjesa

Privredni subjekt Industrija piva i sokova Trebjesa d.o.o. Nikšić je registrovan u Centralnom registru privrednih subjekata Crne Gore pod brojem 5-0664628/008, sa sjedištem na adresi Njegoševa br.18, Nikšić. Jedini član i osnivač društva jeste privredni subjekt Molson Coors Netherlands B.V. Naritaweg 165, Amsterdam, Holandija.

Osnovna djelatnost privrednog subjekta Trebjesa je proizvodnja piva.

1.2. Privredni subjekt Bavaria

Privredni subjekt Bavaria sa sjedištem u 5737 ZG Lieshout, P.O. Box 1, Holandija registrovan je u privrednoj komori Holandije pod brojem 17007387 sa osnovnom djelatnošću proizvodnja piva.

Proizvodi privrednog subjekta Bavaria pripadaju segmentu tzv. premium piva koji čine poznati svjetski brendovi, a na tržište Bosne i Hercegovine Bavaria izvozi svoje proizvode putem jednog domaćeg

¹ *** Podaci predstavljaju poslovnu tajnu u smislu člana 38. Zakona o konkurenciji

distributera, a prema procjenama nezavisnih izvora tržišno učešće Bavarie na tržištu Bosne i Hercegovine je (..)**.

2. Propisi koje je Konkurencijsko vijeće primjenjivalo u provedbi predmetnog postupka

Konkurencijsko vijeće je u provedbi predmetnog postupka primijenilo odredbe Zakona o konkurenciji, Zakona o upravnom postupku Bosne i Hercegovine, Odluke o grupnom izuzeću sporazuma između privrednih subjekata koji djeluju na različitim nivoima proizvodnje odnosno distribucije (vertikalni sporazumi) („Službeni glasnik BiH“, broj 18/06), Odluke o definisanju kategorija dominantnog položaja („Službeni glasnik BiH, br. 18/06 i 34/10), te Odluke o utvrđivanju relevantnog tržišta („Službeni glasnik BiH“, br. 18/06 i 34/10).

3. Pravni osnov predmetnog postupka

Pravni osnov predmetnog postupka je Lista uslova zaključena dana 31.07.2017. godine između privrednih subjekata „Bavaria” N.V. Netherlands, s jedne strane i privrednih subjekata Molson Coors d.o.o. Banja Luka, „Zagrebačka pivovara” d.o.o. Zagreb, „Apatinska pivara Apatin” d.o.o. Apatin i „Trebjesa” d.o.o. Nikšić, s druge strane, kojom su definisane pretpostavke za daljnju saradnju, odnosno uvoz i distribuciju proizvoda „Bavaria“ na teritoriju Bosne i Hercegovine.

Lista uslova predstavlja osnov za potpisivanja Ugovora o ekskluzivnoj distribuciji i Ugovora o licenci na osnovu kojih će privredni subjekt Molson Coors vršiti uvoz i distribuciju proizvoda „Bavaria“ 5% alkohola i „Bavaria“ bezalkoholna na teritoriji Bosne i Hercegovine.

Predmetnom Listom uslova između ostalog definisana je klauzula o nekonkurentnosti koja glasi: (..)**.

Postupak po Zahtjevu za pojedinačno izuzeće

U svom Zahtjevu, Podnosilac zahtjeva, opisuje činjenično stanje i okolnosti koje su razlog za podnošenje Zahtjeva te navodi:

(..)**.

Konkurencijsko vijeće je na osnovu navoda iz Zahtjeva i dostavljene dokumentacije, ocijenilo da pojedinačno izuzeće nije moguće utvrditi bez provođenja postupka, te je donijelo Zaključak o pokretanju postupka broj: UP-04-26-4-035-6/17 dana 06.09.2018. godine (u daljem tekstu:Zaključak).

Konkurencijsko vijeće je, u skladu sa članom 33. stav (1) Zakona, aktom broj: UP-04-26-4-035-8/17 od dana 01.10.2018. godine, dostavilo Zaključak Podnosiocu zahtjeva.

Nakon toga, Konkurencijsko vijeće je prema stanju spisa procijenilo da neće biti u mogućnosti donijeti konačno rješenje u roku od 3 mjeseca od dana donošenja Zaključka o pokretanju postupka, kako je propisano članom 41. stav (1) tačka b) Zakona, obzirom da će za utvrđivanje činjeničnog stanja i ocjenu dokaza biti neophodno prikupiti dodatne podatke i izvršiti dopunske analize.

Imajući u vidu naprijed navedene činjenice, kao i činjenicu da se u predmetnom slučaju radi o osjetljivom tržištu, Konkurencijsko vijeće je ocijenilo da je rok za donošenje konačnog rješenja potrebno produžiti za dodatna 3 (tri) mjeseca u smislu člana 41. stav (2) Zakona, te je donijelo Zaključak o produženju roka za donošenje rješenja broj: UP-04-26-4-035-16/17 dana 05.12.2018. godine.

4. Relevantno tržište

Kako bi utvrdilo da li su ispunjeni uslovi za pojedinačno izuzeće, Konkurencijsko vijeće je prilikom ocjene predmetnog ugovora utvrdilo relevantno tržište proizvoda/usluga i relevantno geografsko tržište u skladu sa članom 3. Zakona, te odredbama Odluke o utvrđivanju relevantnog tržišta.

Relevantno tržište, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Slijedom provedene analize, kao relevantno tržište proizvoda je određeno tržište distribucije piva.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cjelokupnu ili značajan dio teritorije Bosne i Hercegovine na kojoj privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Na osnovu podataka na koje Podnosilac zahtjeva ukazuje, distribucija piva će se u predmetnom slučaju odvijati na cjelokupnoj teritoriji Bosne i Hercegovine.

U skladu sa navedenim, kao relevantno tržište je određeno tržište distribucije piva na teritoriji Bosne i Hercegovine.

4.1. Analiza relevantnog tržišta

Prilikom ocjene predmetnog Sporazuma, Konkurencijsko vijeće je od Podnosioca zahtjeva tražilo dostavljanje finansijskih i drugih relevantnih podataka/analiza, a u cilju sveobuhvatne analize relevantnog tržišta.

Pregled tržišnog učešća Podnosioca zahtjeva i njihovih konkurenata na relevantnom tržištu distribucije piva u Bosni i Hercegovini:

Tabela 1.

	Naziv privrednog subjekta	Tržišno učešće (%)
1.	Molson Coors Brewing Company *	(..)**
2.	Banjalučka pivara	(..)**
3.	Heineken	(..)**
4.	Pivara Tuzla	(..)**
5.	Carsberg	(..)**
6.	Sarajevska pivara	(..)**
7.	Bihaćka pivara	(..)**
8.	Bavaria	(..)**
1+8	Molson Coors Brewing Company+ Bavaria	(..)**
	UKUPNO	100,00

Izvor: Zahtjev

* Privredni subjekti Molson Coors Banja Luka, Zagrebačka pivovara, Apatinska pivara i Trebjesa su članice korporacije Molson Coors Brewing Company

Privredni subjekt Bavaria prisutan je u Bosni i Hercegovini putem domaćeg distributera „Antonio Trade“ d.o.o Grude, te se tržišno učešće privrednog subjekta Bavaria u Bosni i Hercegovini procjenjuje na oko (..)**.

Prema podacima koje je Podnosilac zahtjeva naknadno dostavio na zahtjev Konkurencijskog vijeća utvrđeno je da je kao rezultat distribucije proizvoda „Bavaria“ od strane privrednog subjekta Molson Coors Banja Luka došlo do znatnog povećanja distribucije navedenog brenda, odnosno povećanja broja trgovačkih i ugostiteljskih objekata u kojima je pomenuti brend zastupljen u Bosni i Hercegovini, čime je povećana njegova dostupnost krajnjim potrošačima. Numerički pokazatelji su sljedeći:

- (..)**
- (..)**

Nakon preuzimanja distribucije brenda „Bavaria“ od strane privrednog subjekta Molson Coors, zaključeni su ugovori ili aneksi ugovora o distribuciji navedenog brenda sa 25 distributera širom Bosne i Hercegovine, čime je povećana geografska rasprostranjenost brenda na tržištu Bosne i Hercegovine i unaprijeđena mogućnost njegove distribucije i dostave.

5. Utvrđeno činjenično stanje i ocjena dokaza

U skladu sa članom 4. stav (1) Zakona, zabranjeni su sporazumi, ugovori, pojedine odredbe sporazuma ili ugovora, zajednička djelovanja, izričiti i prešutni dogovori privrednih subjekata, kao i odluke i drugi akti privrednih subjekata koji za cilj i posljedicu imaju sprječavanje, ograničavanje ili narušavanje tržišne konkurencije na relevantnom tržištu, a koji se odnose na direktno ili indirektno utvrđivanje kupovnih i prodajnih cijena ili bilo kojih drugih trgovačkih uslova, ograničavanje i kontrolu proizvodnje, tržišta, tehničkog razvoja ili ulaganja, podjelu tržišta ili izvora snabdijevanja, primjenu različitih uslova za identične transakcije sa drugim privrednim subjektima, dovodeći ih u nepovoljan položaj u odnosu na konkurenciju, zaključivanje takvih sporazuma kojima se druga strana uslovljava da prihvati dodatne obaveze koje po svojoj prirodi ili običajima u trgovini nisu u vezi sa predmetom sporazuma.

U smislu člana 4. stav (3) Zakona, predmetni sporazumi nisu zabranjeni ako doprinose unapređenju proizvodnje ili distribucije robe i/ili usluga unutar Bosne i Hercegovine, ili promociji ekonomskog razvoja i tehničkog razvoja, pri čemu potrošačima omogućavaju pravičan udio koristi koja iz njih proizilazi, a koji nameću samo ograničenja neophodna za postizanje ciljeva i ne omogućavaju isključivanje konkurencije u bitnom dijelu predmetnih proizvoda ili usluga.

U skladu sa članom 5. stav (1) Zakona, Konkurencijsko vijeće, na zahtjev jedne ili više stranaka u sporazumu/ugovoru može donijeti rješenje o pojedinačnom izuzeću od zabrane sporazuma, iz člana 4. stav (1) Zakona, ako sporazum/ ugovor ispunjava uslove, iz člana 4. stav (3) Zakona.

Član 3. stav (1) tačka a) Odluke o grupnom izuzeću sporazuma između privrednih subjekata koji djeluju na različitim nivoima proizvodnje odnosno distribucije (vertikalni sporazumi) glasi:

„Grupno izuzeće se primjenjuje na vertikalne sporazume iz člana 7. stav (1) tačka b) Zakona, a posebno na:

a) Sporazume o isključivoj distribuciji kojima se dobavljač obavezuje na prodaju proizvoda i/ili usluga koji su predmet sporazuma samo jednom odabranom distributeru na određenom teritoriju ili posebno određenoj grupi kupaca koja je isključivo dodjeljena tom distributeru.“

Analizom predmetnog sporazuma, odnosno Liste uslova zaključene između učesnika u postupku Konkurencijsko vijeće je utvrdilo da ista sadrži odredbe koje ograničavaju tržišnu konkurenciju, u smislu člana 4. stav (1) Zakona:

- (..)**:

Konkurencijsko vijeće je ocijenilo da predmetna Lista uslova, i na osnovu iste kasnije zaključeni Ugovor o ekskluzivnoj distribuciji i Ugovor o licenci sadrže odredbe sporazuma zaključenih između privrednih subjekata koji djeluju na različitim nivoima distribucije - vertikalni sporazum između privrednog subjekta „Bavaria“ N.V. Netherlands i privrednih subjekata Molson Coors d.o.o. Banja Luka, „Zagrebačka pivovara“ d.o.o. Zagreb, „Apatinska pivara Apatin“ d.o.o. Apatin i „Trebjesa“ d.o.o. Nikšić.

Ocjena o tome je li sporazum zabranjen ili nije, zavisi o ekonomskoj i pravnoj analizi uslova na relevantnom tržištu, odnosno o omjeru između njihovih pozitivnih i negativnih učinaka. Pri tome u obzir treba uzeti prirodu Sporazuma, područje i ciljeve Sporazuma, konkurentske odnose između ugovornih strana. Ugovorne strane moraju dokazati da je ograničenje tržišne konkurencije nužno za postizanje određenih objektivnih ekonomskih koristi. Nužnost ograničenja utvrđuje se prema prilikama na tržištu i trajanju sporazuma.

Konkurencijsko vijeće je pri ocjeni predmetne Liste uslova i na osnovu iste kasnije zaključenih Ugovora o ekskluzivnoj distribuciji i Ugovora o licenci, uzelo u obzir obrazloženje Podnosioca zahtjeva da će isti unaprijediti proizvodnju i distribuciju roba i usluga unutar Bosne i Hercegovine, a koji posebno navodi:

- da trenutno nije moguće obezbjediti sveobuhvatnu i ravnomjernu distribuciju brenda „Bavaria“, te da će realizacijom navedenog sporazuma, putem razvijene distributivne mreže privrednog subjekta Molson Coors doći do unapređenja distribucije brenda „Bavaria“ i obezbjeđenja bolje snabdjevenosti tržišta i dostupnosti navedenih proizvoda krajnjim potrošačima u Bosni i Hercegovini;
- da će se realizacija poslovne saradnje u skladu sa Listom uslova pozitivno reflektovati na krajnje potrošače, pošto će im biti dostupniji međunarodni brend „Bavaria“, koje će moći kupiti po pristupačnijoj cijeni;
- da Molson Coors planira zaključiti podugovore sa većim brojem poddistributera pod istim i transparentnim komercijalnim uslovima;
- da Bavaria kao renomirana kompanija iz pivarske industrije, garantuje svojim potrošačima da svi njeni proizvodi zadovoljavaju najstrožije standarde kvaliteta u pivarskoj industriji i da će u skladu sa Listom uslova potrošači u Bosni i Hercegovini biti snabdjeveni sa proizvodima najvišeg kvaliteta;

Konkurencijsko vijeće je ocijenilo, iako predmetna Lista uslova sadrži odredbe iz zabranjenih sporazuma (iz člana 4. stav (1) Zakona), da je Podnosilac zahtjeva u dovoljnoj mjeri argumentovao i dokazao ispunjenost Zakonom propisanih uslova za pojedinačno izuzeće predmetnog restriktivnog Ugovora od zabrane, budući da će isti doprinijeti unapređenju proizvodnje ili distribucije roba i/ili usluga u Bosni i Hercegovini, promociju tehničkog i ekonomskog razvoja, pri čemu će potrošačima omogućiti pravičan udio koristi koja iz njih proizilazi, jer se zaključivanjem i sprovođenjem predmetnih Ugovora nameću samo ograničenja neophodna za postizanje ciljeva i ne isključuju konkurenciju u bitnom dijelu predmetnih proizvoda i/ili usluga, u smislu člana 4. stav (3) Zakona.

Konkurencijsko vijeće je, pri donošenju odluke uzelo u obzir da na relevantnom tržištu distribucije piva na teritoriji Bosne i Hercegovine djeluje veći broj privrednih subjekata, kao i konkurentan broj svjetskih brendova koji spadaju u segment tzv. premium piva, dok je s druge strane tržišno učešće holandskog brenda „Bavaria“ od (...)**% marginalno, te da će realizacija predmetnog sporazuma pozitivno djelovati na razvoj konkurencije u navedenom segmentu tržišta.

Konkurencijsko vijeće je također, pri donošenju odluke uzelo u obzir i činjenicu da je privredni subjekt Molson Coors na osnovu Liste uslova koja predstavlja osnov za zaključivanje Ugovora o ekskluzivnoj distribuciji, zaključio ugovore ili anekse ugovora o distribuciji holandskog brenda „Bavaria“ sa 25 distributera širom Bosne i Hercegovine, čime je povećana geografska rasprostranjenost brenda na tržištu Bosne i Hercegovine što će imati pozitivne efekte za krajnje potrošače.

Budući da je članom 6. stav (2) Zakona utvrđeno da pojedinačno izuzeće ne može trajati duže od pet godina, a stavom (5) istog člana da pojedinačno izuzeće važi od dana zaključivanja sporazuma, slijedom toga Konkurencijsko vijeće je primijenilo navedene odredbe.

Na osnovu navedenog, Konkurencijsko vijeće je odlučilo kao u dispozitivu ovog Rješenja.

6. Administrativna taksa

Podnosilac zahtjeva na ovo Rješenje, u skladu sa odredbom člana 2. stav (1) tarifni broj 107. tačka a) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11) je dužan platiti administrativnu taksu u iznosu od 2.000,00 KM u korist Budžeta institucija Bosne i Hercegovine.

7. Pouka o pravnom lijeku

Protiv ovog Rješenja nije dopuštena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Rješenja.

Predsjednica

Adisa Begić